


Autor , y compositor Herman (Manchi) Hennep a bai laga nos



Diamars dia 22 di September Coro La Escala a recibi e triste noticia cu e Maestro, Poeta, Escritor, Musico y Compositor, Sr Herman Isnardus Hennep, cariñosamente conoci como "Manchi" a fayece inesperadamente. Manchi a nace na Aruba dia 22 di Maart 1942 y a biba den caya principal unda antes tabata La Linda. E ta bini di tata Surinameno y mama Arubano. E tabata tin un infancia hopi felis y di chiquito el a muestra e habilidad pa arte, pues e tabatin sanger di su tata cu tabata pianista y fotografo. E tabata casa cu Sra. Jutta Leeftang y tata di 5 yui cu ta Vicente, Andre, Diana, Cecilia y Fransequita. Manchi a haya su educacion na basis La Salle Colegio y Mulona St Dominicus College. Tambe e tabata miembro di De Trupialen cu a produci hopi talento musical na Aruba. Eynan el a canta y actua. Ora cu el a termina su Mulo el

a dicide di bai studia pa Maestro di School na Suriname. na unda el a studia e prome parti y despues Manchi a bai Hulanda unda el a gradua como Maestro di school. Despues cu el a termina su studio Manchi a bolbe Aruba y a traha como maestro na diferente school y despues el a haya oportunidad na Prinses Beatrix school unda a traha pa 6 aña, despues a bolbe Hulanda pa un studio di un aña y ora el a caba a bolbe Aruba pa traha den enseñansa y den su tempo liber a practica musica. Manchi ta fundador di "Trio Caribe" cu a haci varios bunita presentacion fond di nos isla. Na 1971 Manchi a bolbe Hulanda pa traha como docente y a sa di gana un competencia di Poesia. Na 1983 Manchi a bira hopi malo y despues di dos operacion pa salba su bida el a keda paralitico. Durante su estadia na hospital na Hulanda Manchi

a conoce un Asistente Social cu a duna Manchi conseho pa skirbi y compone. Ora Manchi a bolbe Aruba el a bishita Biblioteca Nacional y aki a ripara cu casi no tabatin buki pa hubentud y a dicide di skirbi su prome buki "Buscando Felicidad" dedica na e hobennan. Su di dos buki "Tres Diferente Ruta" ta relaciona cu hendenan cu problema di droga, y su di tres buki "Ursula" inspira na un historia di un Senora Aleman di 90 aña biba na Hulanda tambe a bira un exito grandi. Den a buki aki bo ta haya sa con e senora aki a pasa den guerra. Manchi a dedica hopi di su tempo liber pa skirbi poesia, historia, y compone cancionnan. Semper el a gusta participa den actividadnan cultural. Manchi a skirbi hopi articulo pa Diario y a ricibi gran aceptacion di su lectoran. Manchi tabata Director musical di Coro La Escala,



funcion cu el a desempeña cu hopi responsabilidad Y profesionalismo. Como persona semper Manchi tabata caluroso y amabel cu un y tur. E tabata un persona alegre, gusta su humor, sin embargo masha serio y corecto. Si e tabata tin algo di bisa e ta bis'e, splica y coregi. Manchi tabata un esposo y tata ehemplar y nunca a laga su handicap ta un estorbo den locual e ta haci pa su familia, su hogar y su amistadnan. E tabata admira cerca hopi

musico y artista riba nos isla, a toca pa varios agrupacion musical grandi y chiquito, den tur sorto di actividad, deleitando su audiencia unda cu e tabata cu su guitarra. Coro La Escala ta uni su mes na e duelo y luto cu su inseparable senora Jutta, yiunan, familiares y su amigonan mas cercano y nos ta manda nos profundo palabra di pesame. Paz na su alma (1942-2015)

Coro La Escala

